

Ay Nobe!

Digicel ta sumamente satisfecho cu e Festivalnan di Dande 2018

REPRESENTANTE di Digicel, sr. Lincoln Gomez a expresa su satisfaccion grandi cu e Festivalnan di Dande 2018. Digicel ta contento di por a sponsor e gran eventonan cultural aki y ta sigura pueblo di Aruba cu Digicel ta dispuesto pa sigui carga y duna sosten na Festival di Dande.

E cantidad y calidad di participante den e festival di hoben y adultonan ta duna Digicel hopi animo pa sigui carga e evento cultural aki.

Palabranan di gratitud ta bay na sr. Harry Croes, su yiu Jessica como tambe na Ray-Anne Hernandez y tur fundacion y hendenan cu a organisa y ehecuta e dos dianan yena di Dande, cultura y folklore den Centro di Barrio Tanki Leendert y na Plaza Betico Croes.

Palabranan di danki tambe ta bay n'e publico cu a scoge pa bin sostene y apoya tur e participantenan den un evento folklórico. Tambe, di parti di Digicel, ta gradici e otro sponsornan y ta spera di por conta cu mas sosten den futuro.

Digicel ta orguyoso di tur participante y finalistanan. Tur participante a duna un bunita presentacion. Na ambos evento nos por a mira participantenan wordo corona cu a presenta un Dande pa prome biaha. Esaki ta muestra cu dedicacion, un tiki curashi y hopi alegria, tur hende por logra cualkier reto nobo.

E 2 ganadornan di e Festival di Dande a duna un presentacion excepcional.

Nos Rey di Dande 2018, Edjean Semeleer a muestra cu un tiki creatividad y e talento musical di e tipico e por pone sauce den e sonido manteniendo e integridad di e estructura di e Dande. Su corona ta un simbolo cu tradicion no ta significa stagnacion.

Nos Reina di Dande 2018, Sharella Lopez a convence e hurado y e publico presente cu un presentacion dinamico yena di forza y fe den su mes y e palabranan cu ela canta. Masha Pabien!



Tambe ta gradici Minister di Cultura sra. Xiomara Ruiz-Maduro, kende a keda te na final pa coronacion di e Rey y Reina di Dande 2018.

Digicel ta gradici e medionan di comunicacion cu a percura pa transmision di e festival p'asina cu henter Aruba hunto cu Digicel por a goza di e gran festival aki. Digicel den su 15 aña, ta aporta na engrandece cultura di Aruba. Danki Aruba!!!!